

POLICY DIALOGUE Reviving Dhaka's Rivers: Policy Option for Sustainable Management

Venues Syndicate Hall, NSU
Date: 22nd September 2025 | Time: 11 AM to 1 PM



উপদেষ্টা সৈয়দা রিজওয়ানা হাসান নর্থ-সাউথ বিশ্ববিদ্যালয়ে পলিসি ডায়ালগে বক্তব্য রাখেন

নর্থ সাউথ ইউনিভার্সিটিতে সংলাপ ঢাকার নদী রক্ষায় সামগ্রিক পদ্ধতি প্রয়োজন : রিজওয়ানা

নর্থ সাউথ ইউনিভার্সিটির (এনএসইউ) সাউথ এশিয়ান ইনস্টিটিউট অব পলিসি অ্যান্ড গভর্নেন্স (এসআইপিজি), এইচ অ্যান্ড এইচ (হুসেন অ্যান্ড হুসেন) ফাউন্ডেশনের সহযোগিতায় এবং বিআইডব্লিউটিএ, ঢাকা উত্তর সিটি করপোরেশন, বার্কি, ডাইকি এক্সিস ও সিএসডি একাডেমির সমর্থনে এনএসইউ-এর সিডিকিট হলে 'ঢাকার নদীগুলোকে পুনরুজ্জীবিত করা : টেকসই ব্যবস্থাপনার জন্য নীতিগত বিকল্প' শীর্ষক একটি নীতি সংলাপের আয়োজন করে।

বুড়িগঙ্গা, তুরাগ, শীতলক্ষ্যা, ধলেশ্বরী, এবং বালু নদী দ্বারা পরিবেষ্টিত ঢাকা শহর শিল্পবর্জ্য, পৌরসভার আবর্জনা, শহুরে বর্জ্য, অবৈধ দখল এবং জলাভূমি হারানোর কারণে মারাত্মক দূষণের শিকার। এই সংলাপে নীতিনির্ধারক, শিক্ষাবিদ, শিল্পবিশেষজ্ঞ এবং সুশীলসমাজের প্রতিনিধিরা নদী পুনরুদ্ধারের জন্য কার্যকর কৌশল প্রণয়নে একত্রিত হন।

অনুষ্ঠানের সম্মানিত অতিথি পরিবেশ, বন ও জলবায়ু পরিবর্তন বিষয়ক মন্ত্রণালয় এবং পানিসম্পদ মন্ত্রণালয়ের উপদেষ্টা সৈয়দা রিজওয়ানা হাসান শহরের প্রকৃতি-কেন্দ্রিক অগ্রাধিকারের অভাবের ওপর জোর দেন। তিনি চট্টগ্রাম-কক্সবাজার রেলওয়ের মতো প্রকল্পের পরিবেশগত ক্ষতির উদাহরণ তুলে ধরেন এবং একটি সফল সামগ্রিক পদ্ধতির উদাহরণ হিসেবে গঙ্গা নদীর কথা উল্লেখ করেন। তিনি বলেন, 'ঢাকার নদীগুলোকে রক্ষা করতে একটি সামগ্রিক, প্রকৃতি-কেন্দ্রিক পদ্ধতি প্রয়োজন, দ্রুত সমাধান অপরিবর্তনীয় পরিবেশগত ক্ষতি রোধ করতে পারবে না।'

বিশেষ অতিথি ঢাকা উত্তর সিটি করপোরেশনের প্রশাসক মোহাম্মদ এজাজ ঢাকার দু'টি মৃত নদীর সফল পুনরুদ্ধারের কথা তুলে ধরেন এবং উৎস থেকে পানি ব্যবস্থাপনার ওপর গুরুত্বারোপ করেন। তিনি একটি স্মার্ট ও টেকসই ঢাকা গড়ার জন্য জীববৈচিত্র্যকে অগ্রাধিকার দেয়ার আহ্বান জানান।

জগন্নাথ বিশ্ববিদ্যালয়ের সহযোগী অধ্যাপক এবং এনএসইউ-এর অ্যাডজাক্ট ফ্যাকাল্টি ড. আবদুস সামাদ মূল প্রবন্ধ উপস্থাপন করেন। তিনি বলেন, ঢাকার নদীগুলো, বিশেষ করে বুড়িগঙ্গা ও শীতলক্ষ্যা, অপরিশোধিত শিল্পবর্জ্য এবং দুর্বল আইনের কারণে মারাত্মকভাবে দূষিত হচ্ছে। তার সমাধানে একটি নদী সুরক্ষা কর্তৃপক্ষ গঠন এবং পরিষ্কার পরিবেশ-বান্ধব অনুশীলনের জন্য অর্থনৈতিক প্রণোদনার কথা অন্তর্ভুক্ত রয়েছে।

এনএসইউ-এর রুইমেট চেঞ্জ অ্যান্ড ডিসাস্টার রেজিলিয়েন্স সেন্টারের পরিচালক অধ্যাপক ড. মো: জাকারিয়া নদীদূষণের দীর্ঘমেয়াদি প্রভাব রয়েছে এবং অপরিবর্তনীয় ক্ষতি রোধে সমন্বিত নীতি, আচরণগত পরিবর্তন এবং সামাজিক সম্পৃক্ততা প্রয়োজন তা জোর দিয়ে বলেন। জনস্বাস্থ্য ও যোগাযোগ বিশেষজ্ঞ অধ্যাপক ড. অনুপম হোসেন নদীদূষণের বিপদ এবং অন্তর্গত বিষয়ক সহযোগিতার প্রয়োজনীয়তা তুলে ধরেন। তিনি ডাক্তার, প্রকৌশলী, গবেষক এবং নীতিনির্ধারকদের অংশগ্রহণে বাস্তবসম্মত ও সাশ্রয়ী সমাধানের ওপর গুরুত্বারোপ করেন।

এইচ অ্যান্ড এইচ ফাউন্ডেশনের পরামর্শক অধ্যাপক ড. মোহাম্মদ জুলফিকার আলী উল্লেখ করেন যে, দূষণের উৎস জানা সত্ত্বেও আইনপ্রয়োগ ও নীতিপ্রণয়নে দুর্বলতার কারণে কার্যকর পদক্ষেপ নেয়া যাচ্ছে না। নৌপরিবহন মন্ত্রণালয়ের বিআইডব্লিউটিএ-এর চেয়ারম্যান কমোডর আরিফ আহমেদ মোস্তফা নদীব্যবস্থার প্রতিবন্ধকতা চিহ্নিত করে কাঠন বর্জ্য নিয়ন্ত্রণসহ টেকসই ব্যবস্থাপনা বাস্তবায়নের ওপর জোর দেন।

ডাইকি অ্যাক্সিস-বাংলাদেশ লিমিটেডের ব্যবস্থাপনা পরিচালক মি. রুই ওভাস বলেন, বেশির ভাগ নদীদূষণের কারণ হলো অপরিশোধিত পয়ঃনিষ্কাশন। তিনি উৎসে সমাধানের জন্য স্মার্ট, স্বয়ংক্রিয় এবং টেকসই ব্যবস্থার প্রয়োজনীয়তার ওপর জোর দেন। বার্কি এশিয়া প্রাইভেট লিমিটেডের ব্যবস্থাপনা পরিচালক মি. মার্টিন অ্যালকেমিয়ার বলেন, নিখুঁত সমাধানের জন্য অপেক্ষা না করে কাজ শুরু করা উচিত। তার মতে, কালক্ষেপণ করার চেয়ে ধীরে ধীরে উন্নতি করা বেশি কার্যকর।

সেশন চেয়ার, এনএসইউ-এর ভিসি অধ্যাপক আব্দুল হান্নান চৌধুরী বলেন, বর্জ্য ব্যবস্থাপনা নিয়ে প্রায়ই আলোচনা হলেও দূষণকে তার উৎস থেকে মোকাবেলা করার চেষ্টা করতে হবে। তিনি এসআইপিজি-এর নীতি-সংক্ষেপকে একটি কার্যকর কৌশলপত্র হিসেবে উল্লেখ করেন এবং একটি আরো টেকসই ও প্রাণবন্ত ঢাকার আশা প্রকাশ করেন। অনুষ্ঠানটি এইচ অ্যান্ড এইচ ফাউন্ডেশনের সভাপতি ও নির্বাহী পরিচালক এম. শফিক হুসেনের স্বাগত বক্তব্যের মধ্য দিয়ে শুরু হয় এবং এতে সঞ্চালকের ভূমিকা পালন করেন এনএসইউ-এর এসআইপিজি-এর পরিচালক অধ্যাপক ড. শেখ তৌফিক এম. হক।

এই সংলাপ নীতিনির্ধারক, শিল্পপ্রতিষ্ঠানের কর্তৃপক্ষ, গবেষক এবং সাধারণ জনগণের মধ্যে সমন্বিত পদক্ষেপের আহ্বান জানিয়ে শেষ হয়। সবার সম্মিলিত প্রচেষ্টায় ঢাকার নদীগুলোকে রক্ষা করা, জনস্বাস্থ্য উন্নত করা, জীবিকা রক্ষা করা এবং একটি স্থিতিশীল নগর পরিবেশ নিশ্চিত করা সম্ভব। বিজ্ঞপ্তি।